

21/09/1998

Harapan skuasy jadi acara Olimpik cerah

PERSATUAN Raket Skuasy Malaysia (SRAM) gembira acara di arena serba canggih, Pusat Skuasy Nasional itu, membuka mata peringkat tertinggi Jawatankuasa Olimpik Antarabangsa (IOC).

Presiden SRAM, Datuk Alex Lee, ketika berucap di majlis penyampaian pingat pemenang sebagai penutup tirai acara skuasy Sukan Komanwel XVI, semalam berkata ramai pembesar dalam dan luar negara, yang kagum dengan kemudahan gelanggang di situ.

Malah, katanya, Presiden IOC, Juan Antonio Samaranch, yang melawat gelanggang itu lantas menghubungi ibu pejabatnya di Lausanne dan memberi arahan supaya penilaian dibuat terhadap acara itu sebagai langkah pertama untuk melihat skuasy dapat dipertandingkan di Sukan Olimpik.

"Samaranch jelas tertarik dengan acara skuasy berdasarkan terhadap kemudahan gelanggang serba moden, termasuk gelanggang kaca di sini serta penyertaan ramai pemain bertaraf dunia."

"Malah, gelanggang ini juga menjadi antara arena sering mendapat perhatian pembesar tempatan dan luar negara seperti Yang di-Pertuan Agong Tuanku Ja'afar, Perdana Menteri Datuk Seri Dr Mahathir Mohamad, Putera Edward dan hari ini, Putera Phillip."

"Jelas, gelanggang ini saja sudah cukup untuk menarik minat mereka dan saya mengucapkan terima kasih kepada semua pihak yang terbabit memastikan skuasy Sukan Komanwel berjalan lancar," katanya.

Skuasy yang dipertandingkan buat pertama kali dengan menawarkan lima pingat emas bermula 9 September lalu dan berakhir semalam dengan England dan Australia masing-masing memungut dua pingat emas.

Pemain nombor satu dunia dari Scotland, Peter Nichol memenangi pingat emas lelaki untuk Scotland bagi memecah monopoli dua negara kuasa skuasy dunia itu.